

ARCA DE SAN DOANE DA NEPOMUK

Inte a Calzon se cata n atriol – dit l’Arca de San Doane – onde che l é n mut de Doane da Nepomuk, sant envocà contra le brentane e negament. L é fat su sora na granda opra de protezion idraulica de piere ligade a piomp de stravers al sgrasol de la Roa. Chesta arca la é stada metuda su onde che davant se catea l vecio terapien, che l servia da protezion per Agort contra la violenza de le brentane de la Roa. Fabricà nte pi ani e fenì fora del 1772 da Giovanni Battista Ferracina, l manufat l é stat alzà su, daspò del desio de la aluvion del 1748 che – estra che avé causà n grumon de dan al entiera val – l à fis manazà la Pief capoloch de valada. Da inte del atriol na lasta de piera locala, del temp de la realisazion de l’arca, la regorda l’opra del costrutor, l architè Ferracina, e sto tant se pol el liede lico lico. Defati na olta la lasta la era logada de fora dal atriol lassada al burt temp che l à scanzelà na bona part de le scarpelade, fin cande che la lasta de piera no la é stada poiada dalvers onde che la se cata encoi de grazia al intervent del storich don Ferdinando Tamis (1912-1992).
Son sotvia: rumor del aiva che cor